

無上依經

梁天竺三藏法師 真諦 譯



清刻龍藏佛說法變相圖

無上依經卷上

良一

梁天竺三藏法師 真諦 譯

校量造佛功德品第一

如是我聞一時佛婆伽婆住王舍城迦蘭陀
竹林與大比丘衆千二百五十人俱悉是羅
漢諸漏已盡所作已辦捨諸重擔獲得已利
盡諸有結其心善得解脫善得自在善通奢
摩他毗婆舍那其名曰淨命阿若憍陳如淨
命馬勝淨命賢勝淨命婆沙波淨命摩訶那
摩淨命漚樓頻螺迦葉淨命伽耶迦葉淨命
那提迦葉淨命耶輸陀淨命摩訶迦葉淨命
舍利弗淨命摩訶目犍連淨命須菩提淨命
須婆睺淨命摩訶拘絺羅淨命優波離淨命
富樓那彌多羅尼子淨命摩訶純陀淨命摩
訶劫賓那淨命離波多淨命畢陵伽婆蹉淨

命阿尼樓駄淨命孫陀羅難陀淨命羅睺羅
唯除阿難在學地如是等千二百五十人俱
復有大比丘尼衆五百人俱其名曰摩訶波
闍波提比丘尼青蓮華色比丘尼綺摩比丘
尼跋陀比丘尼難陀比丘尼耶輸陀羅比丘
尼如是等各眷屬復有菩薩摩訶薩無量
百千是賢劫中諸菩薩衆皆悉通達大深法
性從調易化善行平等修菩薩道一切衆生
真善知識得無礙陀羅尼轉不退法輪已經
供養無量諸佛皆從他方世界來集一生補
處聖者彌勒菩薩以爲上首復有優婆塞百
千萬衆頻婆娑羅王以爲上首復有無量百
千優婆夷衆毗提希夫人以爲上首爾時世
尊爲諸天人恭敬尊重隨從供養於是淨命
阿難在大衆中承佛神力即從座起偏袒右

肩右膝著地頂禮佛足向佛合掌而作是言
世尊我於今日著衣持鉢入王舍城次第乞
食我見一處大高重閣莊嚴新成雕飾裝畫
內外宛密見此事已即生心念若清信善男
子善女人造此大高重閣布施四方衆僧并
具四事若如來滅後取佛舍利如芥子大安
立塔中起塔如阿摩羅子大戴剎如針大露
盤如棗葉大造佛如麥子大此二功德何者
爲勝今問世尊唯願解說佛言善哉善哉阿
難能問如來如此大事汝能修行衆多利益
憐愍世間作歸依處能令人天得道安樂能
拔衆生不住苦地是故阿難汝今諦聽專思
念之敬心信受善哉世尊願樂欲聞佛言阿
難此閻浮提世界縱廣七千由旬其洲北邊
廣大南方如車人面亦爾其中悉滿須陀洹

斯陀舍阿那舍阿羅漢辟支佛等譬如蔗林
竹林荻林若麻田若稻田稠密不空無間缺
處如是阿難此閻浮提滿須陀洹乃至辟支
佛若有一人盡形壽供養衣服飲食湯藥卧
具入涅槃後悉起大塔供養然燈燒香塗香
抹香華鬘衣服傘蓋幢幡等阿難於意云何
是人以是因緣生功德多不阿難言甚多世
尊甚多修伽陀是人以是因緣生功德多佛
言阿難且置閻浮提洲西瞿耶尼縱廣八千
由旬其洲作半月形人面亦爾其中滿須陀
洹乃至辟支佛等譬如蔗林竹林荻林若麻
田若稻田稠密不空如是阿難此瞿耶尼悉
滿須陀洹乃至辟支佛等若有一人盡形壽
供養衣服飲食湯藥卧具入涅槃後悉起大
塔供養然燈燒香塗香末香華鬘衣服傘蓋

幢幡等阿難於意云何是人以是因緣生功
德多不阿難言甚多世尊甚多修伽陀阿難
且置瞿耶尼洲東弗于逮縱廣九千由旬其
洲圓如滿月人面亦爾滿中須陀洹乃至辟
支佛譬如蔗林竹林荻林若麻田若稻田稠
密不空如是阿難此弗于逮滿須陀洹乃至
辟支佛等若有一人盡形壽供養衣服飲食
湯藥卧具入涅槃後悉起大塔供養然燈燒
香塗香末香華鬘衣服傘蓋幢幡等阿難於
意云何是人以是因緣生功德多不阿難言
甚多世尊甚多修伽陀阿難且置東弗于逮
洲北鬱單越縱廣十千由旬其洲方人面亦
爾滿中須陀洹乃至辟支佛譬如蔗林竹林
荻林若麻田若稻田稠密不空如是阿難北
鬱單越滿中須陀洹乃至辟支佛等若有一

人盡形壽供養衣服飲食湯藥卧具入涅槃
後悉起大塔供養然燈燒香塗香末香華鬘
衣服傘蓋幢幡等阿難於意云何是人以是
因緣生功德多不阿難言甚多世尊甚多修
伽陀阿難且置北鬱單越洲天帝釋天宮住
處有大飛閣名常勝殿八萬四千高樓圍遶
八萬四千青瑠璃柱真金寶網羅覆其上金
繩鈴網四面張施金銀寶沙栴檀香水雜種
天華灑布其地八萬四千綺飾窓牖毗瑠璃
寶因陀尼寶羅頗黎寶蓮華色寶等間廁莊
嚴八萬四千扶欄良一階道純青瑠璃之所合成
阿難若有清信善男子善女人造作如帝釋
天宮飛閣高樓常勝寶殿百千拘胝施與四
方衆僧若復有人如來般涅槃後取舍利如
芥子大造塔如阿摩羅子大戴刹如針大露

盤如菓葉大造佛形像如麥子大此功德前
所說百分不及一千萬億分乃至僧祇數分
所不及一分分不相及譬喻所不及何以故
如來無量故阿難且置如是功德此閻浮提
西瞿耶尼東弗于逮北鬱單越大海須彌及
鐵圍山并娑婆世界碎爲微塵以此次第數
悉是須陀洹斯陀舍阿那舍阿羅漢辟支佛
若有清信善男子善女人盡形壽供養若滅
度後起塔供養於意云何是善男子善女人
得福多不甚多世尊甚多修伽陀佛告阿難
若善男子善女人佛涅槃後取舍利如芥子
大造塔如阿摩羅子大戴刹如針大露盤如
菓葉大造佛如麥子大此功德於前所說百
分不及一千萬億分不及一乃至算數譬喻
所不能及阿難若此功德不迴向阿耨多羅

三藐三菩提此功德聚所獲福報盡娑婆世界微塵數作他化自在天王化樂天王兜率陀天王夜摩天王三十三天王況復轉輪聖王

如來界品第二

佛告阿難佛婆伽婆般涅槃後起剎立塔造像供養功德福報不可稱量微塵算數所不能知云何如此阿難如來希有如來不可思議所以者何爲界爲性不可思議爲菩提爲證得不可思議爲功德爲法不可思議爲利益爲作事不可思議阿難何者是如來界云何如來爲界不可思議阿難一切衆生有陰界入勝相種類內外所現無始時節相續流來法爾所得至明妙善此處若心意識不能緣起覺觀分別不能緣起不正思惟不能緣

起若與不正思惟相雜是法不起無明若不起無明是法非十二有分起緣若非十二有分起緣是法無相若無相者是法非所作無生無滅無減無盡是常是恒是寂是住本性清淨無所染著遠離無垢從煩惱轂超出解脫與如來法正順相應過恒沙數不相離不捨智不思量阿難譬如無價如意寶珠莊嚴瑩治可愛明淨其體圓潔無有垢汙棄之穢泥經百千劫過是已後有人拾取取已洗淨守護保持不令墮墜是如意寶旣被洗持還得清淨不捨寶種如是阿難一切如來昔在因地知衆生界自性清淨客塵煩惱之所汙濁諸佛如來作是思惟客塵煩惱不入衆生清淨界中此煩惱垢爲外障覆虛妄思惟之所構成我等能爲一切衆生說深妙法除煩

惱障不應生下劣心以大量故於諸衆生生
尊重心起大師敬起般若起闍那起大悲依
此五法菩薩得入阿鞞跋致位是諸菩薩復
更思惟此煩惱垢無力無能與根本不相應
無真實本無依處本最清淨本是故無本虛
妄思惟顛倒習起如地水風依本得住是本
者無所依煩惱亦如是無真實依若如實知
正思惟觀是諸煩惱不起違逆我今應觀令
諸煩惱不染著我若有煩惱不能染著是名
善哉若使我等著煩惱染云何能爲衆生說
法解煩惱縛是故我今應捨煩惱應說正法
解衆生縛若有煩惱令生死相續與善根相
應如此煩惱我應攝受爲成熟衆生成熟佛
法如是阿難如來在因地中依如實知依如
量修達如來界無染無著能入生死輪轉生

死非煩惱縛證大方便住無住處寂靜涅槃
速得阿耨多羅三藐三菩提阿難是如來界
無量無邊諸煩惱穀之所隱蔽隨生死流漂
沒六道無始輪轉我說名衆生界阿難是衆
生界於生死苦而起厭離除六塵欲依八萬
四千法門十波羅蜜所攝修菩提道我說名
菩薩阿難是衆生界已得出離諸煩惱穀過
一切苦洗除垢穢究竟淡然清淨澄潔爲諸
衆生之所願見微妙上地一切智地一切無
礙入此中住至無比能已得法王大自在力
我說名多陀阿伽度阿羅呵三藐三佛陀阿
難是如來界於三位中一切處等悉無罣礙
本來寂靜譬如虛空一切色種不能覆不能
滿不能塞若土器若銀器若金器虛空處等
悉無罣礙如來界者亦復如是於三位中一

切處等悉無罣礙阿難一切如來在因地時依如實知依如量修觀如來界五種功德不可說無二相過覺觀境界過一異一切處一味菩薩見已除衆生相除法異相除大結相依無礙智於衆生相續中觀如來界興奇異意咄哉衆生如來即在衆生身內如理不見如來是故我說具分聖道開解無始相結覆障令諸衆生因聖道力破除相結自能證見如理如來真實平等何因如此一切衆生執相所縛不識如來不得如來不見如來阿難如來昔在因地觀如來界通達明了正覺衆法悉平等如正轉無上微妙法輪正直成熟聖弟子衆無量無邊恭敬圍遶住於無餘清涼涅槃乃至世界窮盡不捨衆生爲利益事阿難是如來界自性淨故於衆生處無異相

故無差別故極隨平等清亮潤滑最妙柔賢與其相應阿難譬如水界自性清潤能攝能潤能長一切藥草樹木如是阿難一切諸佛在因地中依如來界修行善根利益衆生爲此事故來入三界現生老病死是諸菩薩生老等苦非真實有何以故已如實見如來界故阿難譬如豪富長者唯有一男端正聰黠保念愛惜瞻視養護情無暫捨是兒稚小貪樂舞戲不悟脚踏墮大深坑糞穢死屍臙爛臭處其兒母親及餘眷屬見子墮坑驚喚大叫嗚呼痛哉煩冤懊惱是諸親屬雖復悲號而身無力怯弱不能入此深坑救拔子苦是時長者速疾馳還念子心重不厭臭穢自入坑中捉子牽出如是阿難我作此喻以顯實義所言死屍糞坑譬於三界其一子者譬凡

夫衆生母及眷屬譬聲聞緣覺是二乘人見諸衆生漂沒有流沉溺生死雖復憂念傷歎慈愍無力無能濟拔令出豪富長者即是菩薩清淨無垢無穢濁心已能證見未曾習法來入生死臭惡之處而現受身濟拔衆生阿難當知如是菩薩大悲希有不可言說超出三界脫諸累縛更入三界受三有生因漚和拘舍羅攝持般若波羅蜜雖有煩惱不能點汙演說正法滅衆生苦阿難是如來界大威神無變異柔潤故汝應知阿難是衆生界是諸聖性無修無不修無行無不行無心無心法無業無果報無苦無樂得入是處是性平等是性無異相是性遠離是性隨從是性廣大是性無我所是性無高下是性真實是性無盡是性常住是性明淨阿難云何是性是

諸聖性一切聖法緣此得成一切聖人依因此性而得顯現故我說之爲諸聖性阿難我今說如來性過恒沙數一切如來不共真實從此法出而得顯現名如來界信樂正說深味愛重一切賢聖人戒定慧身即得成就是故此法名爲法身是法者相攝不相離不捨智非有解是依是持是處若法不相攝相離捨智有解亦是依是持是處是故我說一切法藏無變異故名爲如如無顛倒故名爲實際過一切相名爲寂滅聖人行處無分別智之境界故名第一義阿難是如來界非有非無不染不淨自性無垢清淨相應汝當知阿難云何如來爲界不可思議阿難是如來界在有垢地淨不淨法俱在一時是處不可思惟依甚深理而得解脫成阿羅漢成辟支佛

非其境界阿難有二種法不可通達一者自性清淨法界不可通達二者煩惱垢障不可通達唯阿鞞跋致菩薩與大法相應能聽能受能持諸菩薩聲聞緣覺信佛語故得知此法阿難如來爲此界性不可思議

菩提品第三

佛告阿難何者如來阿耨多羅三藐三菩提諸佛婆伽婆在無漏界一切種障永盡轉依寂靜明淨是無上菩提與十種分相應汝當知何等爲十一者自性二者因緣三者惑障四者至果五者作事六者相攝七者行處八者常住九者不共十者不可思惟阿難何者名爲菩提自性十地六波羅蜜如理如量修出離道所得轉依寂靜明淨聲聞緣覺非其境界是即名爲菩提自性阿難是界未除煩

惱轍我說名如來藏至極清淨是名轉依法有四種相一者生起緣故二者滅盡緣故三者正熟思量所知法果故四者最清淨法界體故何者名生起緣出一切世如來相續是菩提道生起緣處何者名滅盡緣三品煩惱根本種類依因此法永滅盡故何者所知法果已正通達所知真如證得果故何者名法界體滅諸相結最淨法界所顯現故阿難是轉依相是轉依者則佛婆伽婆無上菩提故名菩提性阿難有四種法爲得無上菩提作因何者爲四一者願樂修習摩訶衍法二者修習般若波羅蜜三者修習破虛空三昧門四者修習如來大悲阿難有四種惑障菩提果何者爲四一者棄背大乘法二者邪執我見三者畏生死苦四者不行利益他衆生事

阿難有四種菩提無上勝果何者爲四一者最淨二者真我三者妙樂四者常住是時阿難聞佛語已於衆會中即從座起偏袒右肩右膝著地曲躬恭敬頂禮佛足合掌向佛而說偈言

能說能行甚深理 永度有流不退沒

已過怨結諸怖畏 故我稽首問瞿曇

云何法是菩提因 云何名障名爲果

唯願慈善大悲尊 憐愍我等分別說

是時世尊唱言善哉善哉阿難能問如來甚

深大義汝行利益多衆生故爲令人天得道

安樂汝今諦聽深心渴仰恭敬信受善哉世

尊願樂欲聞佛告阿難世間中有三品衆生

一者著有二者著無三者不著有無著有者

復有二種一者背涅槃道無涅槃性不求涅槃

樂願樂生死二者於我法中不生渴仰誹謗大乘阿難是等衆生非佛弟子佛非大師非歸依處如是人等已住愚盲必墮險怖大闇之中於曠野地更入黑穢棘刺稠林以生死縛作於後際落闍提網不能自出著斷無者亦有二種一者行無方便二者行有方便行無方便復有二人一者在佛法外九十六種異學外道如支羅歌波育婆等二者在佛法中能生信心堅著我見不愛正理我說此人同彼外道復有增上慢人在正法中觀空生於有無二見是真空者直向無上菩提一道淨解脫門如來顯了開示正說於中生空見我說不可治阿難若有人執我見如須彌山大我不驚怪亦不毀咎增上慢人執著空見如一髦髮作十六分我不許可行有方便亦

及一

十二

有二人一聲聞乘唯修自利而不能爲利益
他事二緣覺乘少能利他少事而住少得云
足不著有無者最上利根修行大乘是人不
著生死如闍提不行無方便如外道不行有
方便如二乘云何而行觀於生死及涅槃界
平等一相至得正道其心安止住無住處清
涼涅槃遊行生死不被染汙修大悲心以爲
根本志力高強堅住不動佛言阿難若人貪
著三有誹謗大乘名一闍提墮邪定聚若人
著無行無方便墮不定聚復有著無行有方
便不著有無行平等道名正定聚阿難不著
有無修行平等唯除此人餘有四人一者一
闍提二者外道三者聲聞四者緣覺有四惑
障不能證得如來法身無上菩提何者爲四
棄捨大乘是闍提障爲除此障我說菩薩修

行信樂大乘真法於一切處謬執我見是外
道障爲除此障我說菩薩修行般若波羅蜜
法於生死中厭畏疲極是聲聞障爲除此障
我說菩薩修行破虛空三昧門背利益他小
事爲足是緣覺障爲除此障我說菩薩修行
大悲是四種人有四種惑爲除此惑說四聖
道因此勝道治四顛倒能證如來無上最妙
法身四德波羅蜜果阿難色等諸法悉皆無
常而生常想諸法皆苦而生樂想諸法無我
而生我想諸法不淨而生淨想是名顛倒觀
色等法是無常苦無我不淨不名顛倒是
顛倒若觀如來妙德法身即成顛倒治此顛
倒我說如來法身四德何者爲四一者常住
波羅蜜二者安樂波羅蜜三者真我波羅蜜
四者清淨波羅蜜阿難一切凡夫執內五陰

起顛倒見於無常中而生常見於實苦中而生樂見於無我中而生我見於不淨中而生淨見阿難如來法身是一切智一切種智之境界故聲聞緣覺不能觀察如來法身顛倒修習不可拔斷云何如此如來法身最勝常住應當修習背常住修住無常修如來法身最上妙樂應當修習背妙樂修住於苦修如來法身最勝真我應當修習背真我修住無我修如來法身最極清淨應當修習背清淨修住不清淨修因此倒修聲聞緣覺所住之道非是如來法身四德道所至處是故法身常樂我淨非其境界阿難若有衆生信如來語能見法身常樂我淨是衆生者無顛倒心生真正見云何如此阿難如來法身是真常樂我淨波羅蜜若有衆生因勝妙道觀如來

身是等衆生從明入明從安隱處至勝樂處是佛真子佛心愛念從佛口生得佛成就從法化生得法財分阿難一闍提人棄背正法生死臭穢深心貪樂爲除此惑我說修行願樂大乘依因此法得最淨果阿難一切外道邪執我見而生取著色等諸法良一十四是無我相無諍故三世佛一切處及我說乃名真我是諸外道執內五陰而起我見心安快樂爲破此惑是故我說修習般若波羅蜜依因此法得真我果阿難聲聞人者怖畏生死於苦滅處而生欣樂爲除此執我說修習破虛空三昧門依因此法得具足分世出世樂波羅蜜果阿難緣覺人者不能觀察利益他事與諸衆生不和合住獨處思惟心安快樂爲除此執我說修習菩薩大悲依因此法恒遍十方爲

諸衆生作利益事所留住故得於常住波羅蜜果阿難因此四德一切如來實稱法界不著有無如大虛空修空界最究竟過三際永安住阿難一切阿羅漢辟支佛大地菩薩爲四種障不得如來法身四德波羅蜜何者爲四一者生緣惑二者生因惑三者有有四者無有何者生緣惑即是無明住地生一切行如無明生業何者是生因惑是無明住地所生諸行譬如無明所生諸業何者有有緣無明住地因無明住地所起無漏行三種意生身譬如四取爲緣三有漏業爲因起三種有良一何者無有緣三種意生身不可覺知微細墮滅譬如緣三有中念念老死無明住地一切煩惱是其依處未斷除故諸阿羅漢及辟支佛自在菩薩不得至見煩惱垢濁習氣臭

穢究竟滅盡大淨波羅蜜因無明住地起輕相惑有虛妄行未滅除故不得至見無作無行極寂大我波羅蜜緣無明住地因微細虛妄起無漏業意生諸陰未除盡故不得至見極滅遠離大樂波羅蜜若未能得一切煩惱諸業生難未盡無餘是諸如來爲甘露界則變易死斷流滅無量不得至見極無變異大常波羅蜜阿難於三界中有四種難一者煩惱難二者業難三者生報難四者過失難無明住地所起方便生死如三界內煩惱難無明住地所起因緣生死如三界內業難無明住地所起有有生死如三界內生難無明住地所起無有生死如三界內過失難應如是知阿難四種生死未除滅故三種意生身無有常樂我淨波羅蜜果唯佛法身是常是樂

是我是淨波羅蜜汝應知阿難如來法身大
淨波羅蜜應知有二種自性清淨是其通相
無垢清淨是其別相大我波羅蜜應知有二
種遠離一切外道邪執出過我見虛妄故遠
離二乘計理謬執出過無我虛妄故大樂波
羅蜜應知有二種斷苦集本解習氣縛則能
證得一切苦滅意生諸陰拔除盡故大常波
羅蜜應知有二種既不損減無常諸行出過
斷見故亦不增益常住涅槃出過常見故若
計諸行無常是名斷見若計涅槃常住是名
常見治四惑障翻四顛倒常樂我淨爲其真
果阿難何者是菩提利益事有二種智一者
無分別智二者無分別後智是二種智有二
種事一者爲成就自利二者爲成就利他何
者自利圓滿解脫身持淨法身滅煩惱障一

切智障是名自利無分別智能成此法何者
爲利他從無分別智後乃至盡生死際不作
思量顯二種身說法無窮無間無量爲脫生
死三惡道苦爲欲安立一切衆生置於善道
住三乘處是名利他復次自利與三功德分
不相離一者無漏二者遍滿三者無爲復次
利他與四功德分不相離拔濟衆生不墮四
處一者妄見癡迷疑惑二者苦道惡道墮道
三者以嫉妬心以怨結心破壞正教四者以
下劣心貪樂小乘阿難興此二事自利利他
是菩提事阿難何者名菩提相應法無上菩
提是真實相十九種法與其相應一者不可
思量二者微細三者真實四者道理甚深五
者不可見六者難通達七者常八者在九者
寂十者恒十一清涼十二遍滿十三無分別

十四無著十五無礙十六隨順十七不可執
十八大淨十九澄清此十九法與無上菩提
恒不相離故名菩提相應之法阿難何者是
菩提行處三種道理顯現三身一者甚深道
理二者廣大道理三者萬德道理阿難第一
身者與五種相五種功德相應何者五種相
一者無爲二者不相離三者離二邊四者脫
一切障五者自性清淨何者五種功德一者
不可量二者不可數三者難思四者不共五
者究竟清淨第二身者法身淨流之所顯現
一切無量如來功德摩訶般若大悲爲體與
五種功德相應一者無分別相二者無功用
心三者稱衆生意作利益四者與法身不相
離五者恒遍一時不捨衆生第三身者般若
大悲淨流所顯色種爲體與四分功德相應

一者三十二相二者八十種好三者威德四
者力能於諸衆生根欲性行相攝相應於穢
佛土示現種種本生之事或復示現昇兜率
天或復示現從彼天下或復示現降神母胎
或現初生出胎或現俱摩羅位或現受學十
八明處或現諸戲遊於後園或現出家或現
苦行或詣道場或成佛道或波羅柰轉妙法
輪或堅固林般涅槃那示現如是種種之事
乃至盡于生死後際阿難無上菩提攝三身
盡是故名爲菩提行處阿難何者無上菩提
常住法而此常住有二種法爲作因緣一者
不生不滅二者無窮無盡是名菩提常住法
阿難何者是無上菩提不共相不共有二種
一者不可知若諸凡夫聲聞緣覺不能通達
非其境界二者不可得除佛一人餘無得者

是不共法有五種一者如如理甚深故二者自在不可動故三者清淨無漏界所攝故四者一切所知處無礙故五者爲衆生利益事圓滿故是名菩提不共相阿難何者是無上菩提不可思惟有六種因故不可思惟一者過語言境界二者第一義諦所攝三者已過覺觀分別思惟四者譬類所不能得五者於一切法最上品故六者生死涅槃處不可安立故是名無上菩提不可思惟阿難云何如來爲無上菩提不可思議阿難一切如來住無上菩提處有五種因緣不可思議何者爲五一者自性二者處三者住四者爲一異五者爲利益阿難云何如來爲菩提自性不可思議即色是如來不可得離色是如來不可得受想行識亦如是即地界是如來不可得

離地界是如來不可得水火風界亦如是即眼入是如來不可得離眼入是如來不可得耳鼻舌身意亦如是即有法是如來不可得無法亦如是是名菩提性不可思議阿難云何如來爲菩提處不可思議如來在欲界不可思議離欲界亦不可思議色無色界亦如是如來在人中不可思議離人中亦不可思議六道亦如是如來在東方不可思議離東方亦不可思議十方亦如是是名爲處不可思議阿難何者是如來爲菩提住不可思議阿難安樂住如來住不可思議寂靜住如來住不可思議有心住如來住不可思議無心住如來住不可思議如是梵住聖住如來住不可思議是名爲住不可思議阿難云何如來爲一異不可思議三世如來在一處住何

者一處自性清淨無漏法界是諸如來若一若異不可思議是名一異不可思議阿難云何如來爲利益事不可思議如是如來等一法界智慧神力正勤威德悉皆平等住於無漏清淨法界諸如來等因此轉依能爲衆生無量利益是名利益不可思議復次不可思議有二種一者不可言說過語言境界故二者出一切世於世間中無譬類故是名不可思議復次眞如本不被染本無垢汙不可思議阿難是名菩提不可思議

無上依經卷上

音釋

云	梵	足	切	未	跋	億	梵	飾	切	漚
信	語	也	失	切	蒲	胝	語	也	糲	鳥
不	具		逢	穀	步	也	也	稠	周	侯
具	云		爛	切	苦	離	比	密	直	締
闡	一		爛	良	角	切	云	也	由	丑
昌	闡		落	咄	咨	當	百	切	知	蹉
演	提		肝	當	語	沒	阿	莫	七	何
切	此		切	也	切	致	鞞	割	雕	雕
謬	妄		腐	點	胡	退	梵	切	飾	飾
妄	也		也	慧	八	轉	語	初	刻	都
切			髮	切	切	鞞	也	吏	也	聊
			莫			迷	此	切	飾	切
			高			徒	云	拍	賞	職
			切			結	不	胝	職	職
			闡							
			提							

無上依經卷下

良二

梁天竺三藏法師具謁譯

如來功德品第四

佛告阿難有百八十不共之法此是如來勝妙功德一者三十二相二者八十種好三者

良二

六十八法何者三十二相菩薩修四因緣一持戒二禪定三者忍辱四者捨財捨諸煩惱修此四因堅固不動以此業緣得二種相一者足下平滿所履踐地悉皆平夷稱菩薩脚無有坑坎二者行步平正無有斜戾若菩薩種種供養父母師長種種給濟苦難衆生去來往返勤行此事以此業緣得足下輪相轂輞成就千輻莊嚴若菩薩不逼惱他不行竊盜見他所愛不生貪奪不自矜高除却憍慢於師尊長起迎問訊侍立瞻奉合掌恭敬以

此業緣得二種相一者手指纖長臍直沒節二者其身方大端正莊嚴具前三種業因緣故得足跟長行前三業更修四攝利益他事以此業緣手足十指悉皆網密猶如鵝王若菩薩於師父母扶持侍養自手塗傅酥油膏藥按摩洗浴衣食瞻視得手足柔輒潤澤細滑掌色赤好如紅蓮華若菩薩修諸善法心無厭倦增長上上得足踝臍滿若菩薩修學正法爲他演說徃來宣化不生疲極以是業緣得鹿王躡若菩薩未得之法勤求欲知已得之法利他轉化三種惡業斷塞不起六塵惡法不染身心於身病者施其湯藥於心病者爲作良醫以此業緣得身端直若菩薩見怖畏者爲作救護於貧賤者施與衣食恒懷慚愧遮惡不起以此業緣得陰馬藏若菩薩

護身口意恒令清淨受施知足用亦知量施病者藥施貧者財若有衆生不平等業乃至受用亦不平等勸其修行平等之事以此業緣得身方滿縱橫量等如尼拘類樹若菩薩方便巧修諸勝善法無中下品恒令增上以

良二

此業緣得身毛上靡右旋宛轉若菩薩自性利根多思惟義親近智者值善知識於尊長處灑掃清淨於尊長身洗持按摩於支提處除屏草穢客塵煩惱不令汙心以此業緣得一孔一毛皮膚細滑不受塵水若菩薩衣服飲食車乘卧具諸莊嚴物歡喜施與心無悔悵以此業緣得身金色圓光一丈若菩薩輕美飲食廣施無限令多衆生悉得飽足以此業緣得七處滿若菩薩見善衆生欲與善法同其正業爲其導導安立善中除斷惡事以

此業緣得師子臆若菩薩於衆生中爲利益事修四正勤如師子王心無所畏以此業緣得二種相一者兩肩平整兩腋下滿二者兩臂圓直如象王鼻立過于膝若菩薩離兩舌業於怨憎中作和合語行四攝法攝取衆生

思惟深義修平等慈以此業緣得二種相一

者口四十齒齊密不踈白猶珂雪二者得四牙相如月初生若菩薩見諸衆生有所須欲稱心施與若財若法以此業緣得二種相一者師子頤二者頸圓淨若菩薩守護衆生如

良二

三

視一子多生信心慈念無量廣施醫藥無穢濁心以此業緣得二種相一者咽喉具足千脉以受美味津液流潤二者身鈎鎖骨如那羅延若菩薩自行十善教他修行見修行者歡喜讚歎大悲無量憐愍衆生發弘誓心攝

受正法以此業緣得二種相一者有鬱尼沙頂骨涌起自然成髻二者舌廣薄長如蓮華葉若菩薩恒說實語愛語美語敷演正法不使顛倒以此業緣得梵音聲如迦陵頻伽妙響深遠如天鼓震若菩薩起慈敬心觀諸世間如父如母不起三毒視諸衆生以此業緣得二種相一者眼瞋青好如優鉢羅華二者眼睫紺靑猶如牛王若菩薩見善衆生修三學法稱讚其美不起毀訾見有謗者遮制守護以此業緣得白毫相當於眉間右旋上靡復次阿難菩薩修行四種正業得三十二相一者決定無雜二者諦觀微密三者常修無間四者不顛倒行第一業緣得足下平滿第二業緣得九種相一者足下輪相二者足踝臍滿三者手足十指網密四者皮膚細軟五

者得七處滿六者兩肩平正兩腋下滿七者臂臍圓八者舌廣長九者師子臆第三業緣得五種相一者指纖長二者脚跟長三者身端不曲四者橫豎量等五者頸圓淨第四業緣得餘諸相復次阿難若十方一切衆生俱行十善如此功德更百倍增長以此業緣唯得菩薩一毛之相入一切毛功德更百倍增長然後能得菩薩一好入一切好功德更百倍增長然後能得菩薩一相入一切相功德離白毫相離鬱尼沙如是功德更增百倍得白毫相又增百倍得鬱尼沙相入鬱尼沙功德千倍增長得如來商珂不共之法相好所攝因此相好如來一聲遍滿十方無量世界阿難是三十二相有三因緣不可思議一者時節不可思議修行數滿三阿僧祇劫二者心樂

不可思議爲安樂利益一切衆生故三者品類不可思議修一切善離一切惡是種類無窮故是故如來身具相好不可思議阿難何者如來八十種好一者無見頂二者頂骨無胛脉三者額廣平正四者眉高而長形如初月紺瑠璃色五者廣長眼六者鼻高圓直孔不現七者耳廣厚長輪埵成就八者身堅實如那羅延九者身分不可壞十者身節堅密十一者身一時迴如象王十二者身柔軟十三者身不曲十四者身常少十五者身潤澤十六者身自持不逶迤十七者身分滿足十八者識滿足十九者容儀備足二十者威神遠震二十一者一切處不背他二十二者住處安無能動者二十三其面部如量不大不小長二十四者廣姝二十五其面淨如滿月二

良二

五

十六者面具足滿二十七者正容貌不壞色二十八者儀容如師子二十九者進止如象王三十者行法如鵝王三十一者頭如摩陀那果三十二者足趺厚四指行時印文現三十三者爪如赤銅色高薄圓潤三十四者膝骨堅著圓好三十五者指文莊嚴三十六者脉理深三十七者手文明直三十八者手文長三十九者手文不斷四十者手足如意四十一者手足赤白如蓮華色四十二者孔門相具四十三者步無廣狹四十四者腰圓大四十五者腹不現四十六者齋文如蟠蛇右轉圓深四十七者毛色青紅如孔雀項四十八者毛潔淨四十九者毛右旋五十者口出無上香身毛皆香氣五十一者脣色赤潤如頻婆果五十二者舌色赤五十三者舌形薄

五十四者一切樂觀五十五者隨衆生意和
悅與語五十六者於一切處無非善語五十
七者先與語五十八者隨衆音聲不過不減
五十九者隨衆語言而爲說法六十者說法
不著六十一者等視衆生六十二者先見後
作六十三者發一音報衆聲六十四者次第
有因緣說法六十五者一切衆生眼不能盡
觀相六十六者觀無厭足六十七者一切聲
分具足六十八者善事顯現六十九者剛強
衆生見即調善怖畏衆生便得安樂七十者
音聲明淨七十一者身不傾動七十二者身
分大七十三者其身長七十四者身不染著
七十五者遍身光各一丈七十六者光照身
而行七十七者其身淨潔七十八者髮螺不
亂其髮長好髮色光潤猶如青珠七十九者

良一

六

手足滿八十者手足有德相阿難是名如來
八十種好莊嚴佛身阿難如來有十力何者
爲十一者處非處智力二者隨業智力三者
定類智力四者根品智力五者欲樂智力六
者性類智力七者一切處智力八者宿生智
力九者無生智力十者漏盡智力因此智力
如來顯說最大勝處轉於無上清淨梵輪於
大衆中正師子吼阿難如來有四種無畏一
一切智無畏二漏盡無畏三說障道無畏四
說盡苦道無畏阿難如來有三種念處一者
正行正念二者邪行正念三者雜行正念阿
難如來又有大悲之法阿難如來有十八不
共法一身無過二口無過三意無過四無不
定心五無異想執六無非圓智捨七無欲樂
無減失八無正精進無減失九無念無減失

十無智無減失十一無解脫無減失十二無解脫知見無減失十三身隨智慧行十四口隨智慧行十五意隨智慧行十六窮過去智圓滿十七窮現在智圓滿十八窮未來智圓滿阿難如來獨得如意自在捷疾神通如來

良二

七

獨得無有邊際變化神通如來獨得無量無盡聖神通處如來獨得心自在法如來獨得自在無邊知他心通如來獨得自在無礙天耳神通如來獨得知無色界衆生種別如來獨得通達聖衆般涅槃後如來獨得智慧明了有不定答如來獨得大波羅蜜善能答問如來獨得分別說法無有過失如來獨得開化衆生無有空過如來獨得第一導首如來獨得不可害滅如來獨得金剛三昧如來獨得一切諸法非色非心心不相應如來至知

如來獨得無礙解脫如來獨得三不護法如來獨得斷滅習氣如來獨得一切種智如來獨得金剛聚身如來獨得未曾作意一切事成如來獨得一切諸相與處相應明淨具足如來獨得所授記莭無有不定如來獨得於勝負心佛不許可不得見佛如來獨得轉一切種勝妙法輪如來獨得荷負衆生能捨重擔如來獨得入般涅槃復更起心如來獨得修因圓滿無餘如來獨得至果圓滿無餘如來獨得利益他事圓滿無餘如來獨得辯才無盡如來獨得說一切法悉皆如理阿難如來功德略說有六種一者具足二者無垢三者不動四者無等五者利他六者自在巧能阿難云何如來爲功德不可思議一切如來恒河沙劫無邊功德在於惑地及於淨地相

攝相應未曾相離無垢無淨不可思議

如來事品第五

阿難如來事有十八如來無比最妙最上無有及者令諸衆生起奇特心恭敬供養此第一事因三十二相八十種好而得成就如來

良二

如理通達因果若沙門婆羅門說無因果說不平等因果之法我即制伏令墮負處此第二事因是處非處智力得成如來知見自業自受無有自作他受果者若沙門婆羅門邪說邪教度業度受便能制伏令墮負處此第三事因業類智力得成如來教化顯三種輪一者神通輪二者記心輪三者示教輪訓導弟子以成聖衆若沙門婆羅門有勝負心說違逆法對治正典便能制伏令墮負處此第四事因禪定智力得成如來了達上中下根

如理爲說令其下種成熟解脫此第五事因根種智力得成如來知見三品衆生邪正欲樂如實見已拔斷惡欲增長善欲此第六事因欲樂智力得成如來觀知衆生三種一者羶二者中三者妙今此三人如理得入種種

法門此第七事因性界智力得成如來明見出離道法得解脫果障礙道法得生死果今滅障礙道修出離道此第八事因至一切處智力得成如來明了見宿命事說過去事爲令衆生起厭畏心若執常見沙門婆羅門便能制伏令墮負處此第九事因宿生智力得成如來明見一切衆生死此生彼如理受記若執斷見沙門婆羅門便能制伏令墮負處此第十事因生死智力得成如來自知解脫通達無礙若增上慢沙門婆羅門未得羅漢

謂言已得即能制伏令墮負處此第十一事
因漏盡智力得成如來爲利益事最上善巧
若有人問如來十力如實答難除決彼疑能
立自正說能破他邪說此第十二事因四無
畏得成如來正教有能修者有不修者亦修
不修者如來於此三人無染濁心此第十三
事因三念處得成如來佛眼晝夜恒觀一切
衆生在勝負處救護濟拔此第十四事因大
悲得成如來如說而行能行能說此第十五
事因三不護法得成如來於諸衆生爲利益
事悉皆圓滿無有損減此第十六事因念無
忘失得成如來四威儀中隨從於理無有失
誤此第十七事因滅除習氣得成如來觀三
種法一者行法得利二者行法減損三者行
法亦利亦損離餘二法如來宣說得利益行

此第十八事因一切種智及諸不共法得成
如來阿難如是等如來事汝應知阿難云何
如來爲事不可思議阿難諸如來事無數無
量世間衆生不能覺知雖依語言不能顯現
不可示人令他悟解一切佛土處所無礙一
切如來隨順平等過作意境無分別相猶如
虛空無有分別與法界相稱故諸善男子是
故佛說如來之事不可思議行遍一切處一
切處無失隨行三世處不滅三寶性如來住
是事中如來身相不捨虛空性一切佛土顯
現長二自身如來言說非音聲性同其類音而說
正法如來不取心爲境界諸衆生心根性欲
樂皆悉通達阿難是名如來爲事不可思議
佛說此經已此大會中七萬五千菩薩摩訶
薩即得證見圓滿法身復有七萬五千菩薩

摩訶薩即得大乘妙光三昧復有七萬五千
菩薩摩訶薩於一切法得無生忍無數阿僧
祇衆生於無上菩提起不退心無量阿僧祇
衆生遠塵離垢得法眼淨復有無量衆生證
上上果

讚歎品第六

爾時阿難於衆會中聞佛說已歡喜踊躍得
未曾有從座而起偏袒右肩右膝著地頂禮
佛足恭敬合掌瞻仰尊顏以清淨心說偈讚
歎

於諸三世衆生中 如來最尊無譬類
於人法處無等等 是故平等一切
所應伏滅悉永除 所應知法悉通達
爲智爲勝極第一 唯佛世尊更非餘
有力不怖是實語 如來有力無畏故

世尊人能不損他 即是難思希有事
善巧方便化衆生 非是險惡心迷醉
衆生邪慢自矜高 世尊折伏令除捨
若人有力能勝他 謂是世間成口過
若指如來最極尊 此語至真無虛失
若人依理正問難 無有能使如來屈
如來難伏無闕短 將導衆生至樂處
四種清淨無過失 此四清淨故不護
具足四辯無窮說 法味充溢飽衆生
一切法處智無礙 一切念處無減失
於諸衆生等大悲 於諸世法心不染
通達一切根欲性 已度一切教化法
煩惱品品差別類 敷演種種對治門
世尊說法最第一 凡夫值佛不開解
無明惑闇所覆蓋 是等極難不可度

世尊名聞令渴仰 見佛令人喜無窮
佛語能使心清淨 大師正教脫生死
歎佛能除不吉祥 憶佛令心恒喜樂
見佛即生大般若 解佛便得成種智
如來因戒淨無垢 如來因定意澄清
如來因智不可動 如來法海滿甘露
衆生惛睡佛獨寤 遍視衆生根性欲
衆生放逸如來不 一切衆生平等視
破結賊法佛已說 魔王幻化佛已除
已示生死是過失 已明彼方無畏處
若法可度令他得 猶如世尊行大悲
提婆達多爲最上 一切衆生施菩提
我今不能見正行 修此持報世尊恩
若人已到無餘滅 此人猶未報佛恩
若人能行佛正行 是人唯修自利法

良二

十二

世尊疲極爲衆生 無上深恩云何報
世尊宣說真白法 令人自行教化他
若使如來不出世 唯有苦受逼其身
一切世間唯惡道 但聞叫喚大音聲
六道受苦悉無異 皆因煩惱所纏裹
世尊爲解衆生結 久受大悲之繫縛
世尊無上大福田 能依佛行正行者
如我不見善寶窮 若行惡行亦如是
於佛若起悠悠心 此等衆生墮貧地
忽於世尊起怨諍 永處黑闇復何疑
猶如大師識自身 相似大師亦能識
餘人不能如此識 我今遍禮十方尊
一切功德智力等 世尊示現及法身
大悲欲使衆生識 是故我今頭面禮
妙色好香視無厭 衆相圓滿超諸色

三時開敷甚可愛 如是佛華我頂禮
 世尊善識無上處 一切險難皆出離
 無跡無聚無虛假 我今頂禮兩足尊
 世尊洗濯諸垢汙 住於正法功德水
 從本已來內外淨 我今頂禮真淨身
 世尊善法自具足 常能為眾作益友
 廣雨甘露飽眾生 我今頂禮能利他
 世間所敬最勝人 此人猶故恭敬佛
 眾惡斷盡善圓滿 我今頂禮最勝尊
 無一方便不修學 為愍眾生欲拔濟
 令度生死險難坑 我今頂禮世歸依
 頂禮無喻妙色身 頂禮能說甘露法
 頂禮清淨離垢智 頂禮一切功德林

付囑品第七

佛告阿難汝可受持此正法門爾時阿難長

跪白佛我今從佛聞此深法得未曾有頂戴
 奉持世尊當何名此經云何受持佛言阿難
 此經名無上依亦名未曾有亦名攝善法亦
 名清淨行亦名行究竟阿難有十種法受持
 此經何等為十一者書寫二者供養三者傳
 流四者諦聽五者自讀六者憶持七者廣說
 八者自誦九者思惟十者修行阿難此十種
 法能持此經真功德聚無量無盡阿難譬如
 如意珠王所在之處一切眾寶悉皆出現持
 此經人亦復如是一切善法皆悉得成阿難
 譬如一切樹林藥草悉依於地而得生長善
 法亦爾皆因此經而得增長阿難譬如一切
 善法已生現生當生是不放逸之所攝持不
 放逸行最為第一若經說聲聞法若經說緣
 覺法若經說菩薩法此經所攝最為第一阿

難譬如轉輪聖王若王在世七寶常隨此經亦爾若住於世佛寶法寶僧寶種性相續不絕阿難汝可展轉廣爲比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽人非人等演說此經何以故欲令一切諸衆生類於如來處深種善根佛說此經已阿難及大會菩薩摩訶薩帝釋梵衆護世天等聞佛所說希有法門歡喜踊躍信受奉行

無上依經卷下

音釋

涎也	羊益切	也	切	也	踵	轂
也	切	胃	腋	兩	踝	輶
也	居奄切	骨	羊益切	旁也	胡瓦切	輶
也	切	間也	肘	腿	又古祿切	輶
也	子葉切	頤	腓	時充切	切	輶
也	切	領也	腸也	切	切	輶
也	切	頸	赤	郎果切	切	輶
也	切	頭	體也	切	切	輶
也	切	莖也	臆	力	切	輶
也	切	液	於	足	切	輶
也	切	液	於	足	切	輶

逶迤 逶迤於爲切逶迤委曲貌
 踈 五故切
 寤 寐覺也
 褰 古火切
 齋 徂奚切